

[Straßburg], 14. Oktober [1547]

An Johannes Oporinus

UB Basel, Fr. Gr. I 11, fol. 366r.
Fehlt bei Steinmann.

S. Penè oblitus eram, quod te scire tua refert. Cal[endis] huius mensis in pago Kyppenheim, qui ab Offenburgo et Kentzingen oppidulis, pari interuallo, binis videlicet milliaribus nostratis, distat, M. Ioannem Heugerium parochum eius loci, conueni, visurus, an libros Ciceronis de republica, Phaenomena Ciceronis integra, Philonem graecum, aliquot libros Fastorum Ouidij nondum visos, mihi ostendere vellet, vt mense Augusto se ad diem Septembbris 22 facturum, promiserat. Is igitur me, vt antea quoque faecerat, omnib[us] humanitatis officijs prosecutus est, caeterum se suam Bibliothecam, quam Lucemburgi esse dicebat, nondum accepisse, neque eos libros, quos amicis quibusdam in vicinia communicasset, propter certa negocia cum Marchione Badensi, et rem suam familiarem nondum constitutam, repetijsse. Daturum autem operam, vt quamprimum posset, conquereret et digereret omnia. Tum, vel ipsum ad me venturum huc cum libris, vel ad me scripturum, vt ad se venirem, et eos tibi iustis conditionibus venditurum. Haec ille pollicetur. Caeterum quantum illi fidei adhibendum sit, nondum scio, αὐτὸ δείξει. Homo est multae lectionis, trium linguarum peritus mediocriter, humanus et penè prodigus in studiosos, mater eius ex nobili Buslidiorum familia fuit, pater apud Lucemburgenses magnae dignitatis, ipse varijs casibus iactatus. Fides penes ipsum esto. Nec enim ita esse confirmare ausim. Nam videbatur acrius animaduertenti nonnunquam ἀσκοπα τοξεύειν καὶ τοὺς ἔσωτοῦ λόγους ἐτέροις λόγοις καταπαλαίειν. Si fallit, non tam molesta erit mihi eius vanitas (assueui enim hominum non tantum leuitati, sed etiam quorundam perfidiam et scelera experiri coactus sum) quam mea credulitas. Sin praestabit quod pollicetur, τοῦτ' ἔσται μεῖζον ἡ τροίαν ἐλεῖν. Equidem vrgebo hominem ἀπάσῃ τῇ πανοπλίᾳ μου συμμάχους ὅσους ἀν δύνωμαι προσλαβών. Sed tu quoque Oporine βέλτιστε Henricum Petrum percontaberis an ei cum hoc M. Heugero familiaritas intercedat, et an eius in Valerium commentarios excuderit. Si enim in hoc mentitus fuerit, ἀνθρακες δηλονότι ἔσονται ἡμῖν οι θησαυροὶ. Sin minus, etiam de reliquis aliquandiu bene sperabimus, donec res ipsa nos vel desperare coaegerit vel exhilarauerit. Vale. Pridie idus Octob[ris].

Hiero[nymus] T[uus].